

III. Cæremoniale editum juxta Concilii Baltimorensis Provincialis primi decretum XXXI, in omnibus Provinciis Fœderatis servandum volumus, ut rituum uniformitas ubique vigeat, et in omnibus S. Romanæ Ecclesiæ consuetudines æmulemur.*

IV. Ne Fidelium pia voluntas suo fraudetur effectu, et quæ Deo dicaverint in Ecclesiæ utilitatem, ad alios transferantur usus, monemus Episcopos, Sacerdotes et alios omnes, penes quos bona sunt mobilia vel immobilia ad Ecclesiasticos usus data, ut, eâ quæ in singulis Fœderatis Provinciis tutissima videbitur ratione, quamprimùm curent ea, juxta leges civiles, usibus à donatoribus designatis servanda. Quòd si quis Clericorum, vel Laicorum, hujusmodi bona à designatis usibus contra donatorum voluntatem averterit, se in pœnas à Concilio Tridentino latas (*Sess. XXII, Cap. XI, de Ref.*) incurrere noverit.

V. Placuit ut Rituale edatur Romano conforme, adjectis in appendice quæ ad ædificationem Fidelium conducere visa fuerint, quod Baltimori edatur, auctoritate Illm̃i et Revm̃i Archiepiscopi, et ubique per Fœderatas Provincias servetur. Ne autem peculiare ritus cujusque arbitrio inducantur, districtè vetamus ne Sacerdotes à formâ sibi in Rituali præscriptâ, consuetudinis obtentu vel alio quocumque prætextu, discedant.†

VI. Cùm grave Fidelibus oriatur scandalum, et Ecclesiastico ordini dedecus, dum causæ ecclesiasticæ ad civilia deducuntur tribunalia, hortamur omnes, quorum interest, ut controversias inter eos fortè ori-

* Cæremoniarum liber, juxta præscriptum S. C. de Propagandâ Fide, Romam missus, à SS. D. N. Gregorio PP. XVI approbatus fuit.

† Ut Rituale ab Episcopo S. Ludovici in lucem edi possit concessum fuit à SS. D. N. Gregorio Papa XVI.

turas de rebus vel personis ecclesiasticis, amicè componant, vel saltem judicio Episcopi submittant. Quòd si ecclesiastica vel religiosa utriusque sexûs persona, aliam personam ecclesiasticam vel religiosam utriusque sexûs, coram civili tribunali temerè citaverit de re juris strictè ecclesiastici, noverit se in censuras à jure latas incidere.

VII. Cùm ex Sacerdotum vagorum et ignotorum discursu ad eleemosynas à Fidelibus colligendas gravia oriantur incommoda, visum est districtè prohibere ne Sacerdos aliquis, absque Episcopi sui veniâ, scripto concessâ, extra Congregationem sibi commissam eleemosynas petat, vel in aliâ diœcesi absque Ordinarii licentiâ. Quòd si Sacerdos aliquis hanc legem transgredi præsumperit, hortamur Episcopos ut suspensionis censurâ eum statim innodent. Religiosi autem meminerint sui Superioris licentiam secum afferre.

VIII. Ut omnia juxta ordinem fiant, et solemnes Ecclesiæ ritus integri serventur, monemus Rectores Ecclesiarum ut sedulò invigilent ad abusos eliminandos qui in cantu ecclesiastico in his regionibus invaluerunt. Curent igitur ut sacrosancto Missæ sacrificio et aliis divinis officiis musica, non verò musicæ divina officia inserviant. Noverint, juxta Ecclesiæ ritum, carmina vernaculo idiomate, inter Missarum solemnias, vel Vesperas solemnes, decantare non licere.

IX. Visum est S. Sedi humillimas porrigere preces, ut habitâ ratione gravissimarum quibus subjacent difficultatum Fideles in his Provinciis inter acatholicos degentes, obligatio, quæ in plerisque diœcesibus viget, servandi feriam secundam Paschatis et Pentecostes, tanquam dies festos, auctoritate Apostolicâ

tollatur; ita ut jam non teneantur Missam audire, vel ab operibus servilibus abstinere.

X. Cum varia sit disciplina diœceseon in Fœderatis Provinciis de jejuniò in feriâ quartâ et sextâ servando singulis hebdomadibus Adventûs; supplices litteras ad Sedem Apostolicam dirigendas censuimus, ut à consuetudine illis diebus jejunandi omnes in his Provinciis degentes solvantur, et ab obligatione abstinentiæ feriâ quartâ earum hebdomadam.

XI. Statuimus proximum Concilium Provinciale post triennium, quartâ Dominicâ post Pascha, anno scilicet 1840 habendum, nisi Archiepiscopo citiùs illud convocare visum fuerit.

† Ego SAMUEL, *Archiepiscopus Baltimorensis, definiens subscripsi.*

† Ego JOANNES, *Episcopus Carolopolitanus, definiens subscripsi.*

† Ego JOSEPH, *Episcopus S. Ludovici, definiens subscripsi.*

† Ego BENEDICTUS, *Episcopus Bostoniensis, definiens subscripsi.*

† Ego FRANCISCUS PATRITIUS, *Episcopus Arathensis, et Coadjutor Philadelphiensis, definiens subscripsi.*

† Ego JOANNES BAPTISTA, *Episcopus Cincinnatiensis, definiens subscripsi.*

† Ego GUIDO IGNATIUS, *Bolinensis Episcopus, et Bardensis Episcopi Coadjutor, definiens subscripsi.*

† Ego SIMON, *Episcopus Vincennopolitanus, definiens subscripsi.*

† Ego GULIELMUS, *Episcopus Oriensis, et Coadjutor Carolopolis, definiens subscripsi.*

† Ego ANTONIUS, *Episcopus Neo-Aurelianensis, definiens subscripsi.*

Atque hæc ego infrascriptus testor exemplari RR. DD. Concilii Patrum chirographo munito, in omnibus conformia. In cujus rei fidem, Illm̃i ac Revm̃i D. Archiepiscopi sigillum, ipsius jussu, apposui.

Baltimori, anno R. S. 1837, die 27 Aprilis.

E. DAMPHOUX, S. T. D. *Secretarius.*

EPISTOLA

S. CONGREGATIONIS DE PROPAGANDA FIDE AD ARCHIEPISCOPUM BALTIMORENSEM.

ILLM̃E AC REVME DOMINE,

SYNODI Baltimorensis Decreta, mense Aprili hoc Anno celebratæ, S. Congregatio perpendit: laudavit autem summoperè S. Congregatio Amplitudinis tuæ et Episcoporum qui Synodo interfuerunt sapientiam, ac simul commendavit perspicuum illud studium Religionis boni procurandi, et Ecclesiasticæ disciplinæ custodiendæ, quod in decretis ipsis perspicuè apparet.

Nonnulla quidem in decretis illis reperta sunt quæ immutari debere S. Congregatio existimavit, prout in instructione his litteris adjectâ continetur: sed hoc minimè impedire S. Congregatio censuit, quominùs Bñm Dñm Nostrum GREGORIUM PP. XVI precaretur, ut Apostolicâ auctoritate dignaretur Decreta ipsa confirmare. Itaque his litteris adjectum accipies quoque decretum, ex quo intelliges Sanctitatem Suam decreta Synodi confirmasse: certum enim habet immutationes de quibus in instructione agitur, vos libenti animo esse facturos.

Quod spectat ad novarum Sedium Episcopaliū erectionem, hoc est, Natchetensis, Dubuquensis, Nashvillensis à Synodo commendatam; eam à SS̄mo Dño Nostro libenter, probato S. Congregationis consilio, factam esse, Brevia Apostolica quæ ad Amplitudinem tuam mitto demonstrabunt. Eadem Brevia docent Sedem Episcopalem Natchetensem R. D. THOMÆ HEYDEN collatam esse, Sedem Dubuquensem R. D. MATHIÆ LORAS, Sedem autem Nashvillensem R. P. RICCARDO MILES, ordinis Patrum Prædicatorum, esse tributam.* Accipies etiam Brevia Apostolica his litteris annexa, quibus Sacerdos D. JOANNES HUGHES Coadjutor R. P. D. JOANNIS DUBOIS Episcopi Novi Eboraci designatur. De abdicatione autem R. P. D. RESE, Episcopi Detroitensis, accipiendâ, vel de Coadjutore potiùs ei destinando, Sanctitas Sua sententiam differendam iudicavit, eò quòd ipse Episcopus Detroitensis Romam quamprimùm venturus sit. Placet verò SS̄mo Dño Nostro illum audire, antequàm rem definiat. Circa dispensationes super festorum ac jejuniorum quorundam observatione, quid S. Congregatio et Sanctitas Sua statuerit, in peculiaribus decretis, atque epistolâ quam ad Amplitudinem tuam mitto, luculenter significatur.

Precor Deum, etc.

Romæ, ex Ædibus Sacræ Congregationis de Propagandâ Fide, die 2 Septembris 1837.

JACOBUS PHILIPPUS CARD. FRANSONIUS, *Præf.*
ANGELUS MAIUS, à *Secretis.*

* Diœcesis Natchetensis complectitur *Mississippi* Provinciam. Diœcesis Dubuquensis efformatur ex Occidentali parte Territorii dicti *Wisconsin*, quod ultra flumen *Mississippi*, citra flumen *Missouri*, jacet. Diœcesis Nashvillensis continet totam *Tennessee* Provinciam.

DECRETUM

S. CONGREGATIONIS DE PROPAGANDA FIDE, CIRCA DECRETORUM SYNODI BALTIMORENSIS III CONFIRMATIONEM.

CUM RR. PP. DD. Archiepiscopus Baltimorensis, et Episcopi diœcesum in Fœderatis Americæ Septentrionalis Provinciis existentium, in Synodo Provinciali mense Aprili anno 1837 celebratâ congregati, SS̄mum Dñum Nostrum GREGORIUM PP. XVI precati fuerint ut decreta ab eâdem Synodo edita Apostolicâ auctoritate suâ dignaretur confirmare, si, instituto de iisdem iudicio, confirmatione digna reperta fuissent; S. Congregatio Generalis de Propagandâ Fide, habita die 3 Julii 1837, referente Ēmo ac R̄mo D. JACOBO PHILIPPO S. R. E. Cardinali FRANSONIO, S. Consilii Præfecto, commendatâ plurimùm Synodi sapientiâ, Religionis amplificandæ studio, atque Ecclesiasticæ disciplinæ custodiendæ proposito, censuit ac decrevit supplicandum Sanctitati Suæ ut memoratæ Synodi Decretis confirmationem Apostolicam impertiretur.

Hanc autem S. Congregationis sententiam SS̄mo Dño Nostro relatam ab R. P. D. ANGELO MAIO, S. Consilii Secretario, in audientiâ diei 9 Julii anni 1837, Sanctitas Sua benignè in omnibus probavit, et decreta de quibus agitur, supremâ auctoritate suâ confirmata in Fœderatæ Americæ Septentrionalis diœcesibus servari jussit.

Romæ, ex Ædibus Sacræ Congregationis de Propagandâ Fide, die 2 Septembris 1837.

JACOBUS PHILIPPUS CARD. FRANSONIUS, *Præf.*
ANGELUS MAIUS, à *Secretis.*

PETITUR DISPENSATIO SUPER OBSERVATIONE FERIE
SECUNDÆ PASCHATIS ET PENTECOSTES.

BEATISSIME PATER,

GRAVISSIMIS difficultatibus cum Fideles sub-
ceant in hisce regionibus quoad dierum festorum
observationem, Beatitudinem Vestram implorandam
duximus, ut dignetur eos solvere obligatione quæ
plerisque in diocesis viget, servandi feriam secun-
dam Paschatis et Pentecostes, ita ut jam non tene-
antur Missam audire, vel ab operibus servilibus abs-
tinere iis diebus. Precamur igitur Beatitudinem
Vestram, ut habitâ ratione difficultatum specialium,
dignetur Fideles omnes in hisce Provinciis degen-
tes, onere servandi prædictos dies tanquam festivos
solvere.

Baltimori, 22 Aprilis 1837.

DECRETUM

S. CONGREGATIONIS GENERALIS DE PROPAGANDA FIDE,
CIRCA DISPENSATIONEM SUPER UTRIUSQUE FESTI OB-
SERVATIONE.

CUM RR. PP. DD. Archiepiscopus Baltimorensis
et Episcopi diocesium in Fœderatis Americæ
Septentrionalis Provinciis existentium, in Synodo
Provinciali mense Aprili anno 1837 Baltimori cele-
bratâ congregati, SSmo D. N. GREGORIO PP. XVI
supplici libello Romam misso, retulerint gravem esse
difficultatem quominus Catholici in iis regionibus
morantes, feriâ secundâ Paschatis et Pentecostes ab
operibus servilibus abstinere, et SS. Missæ sacrificio

interesse possint, atque idcirco Sanctitatem Suam
precati fuerint ut super memorati utriusque diei festi
observatione dignaretur dispensare; S. Congregatio
Generalis de Propagandâ Fide, habita die 3 Julii
anno 1837, referente Emo et Rmo D. JACOBO PHI-
LIPPO FRANSONIO, S. Consilii Præfecto, censuit ac
decrevit supplicandum SSmo Dño Nostro pro gratiâ
juxta petita.

Hanc autem S. Congregationis sententiam SSmo
Dño Nostro relatam ab R. P. D. ANGELO MAIO, S.
Consilii Secretario, in audientiâ diei 9 Julii, Sancti-
tas Sua benignè in omnibus probavit, et petitam dis-
pensationem auctoritate Apostolicâ concessit.

Romæ, ex Ædibus Sacræ Congregationis de Pro-
pagandâ Fide, die 2 Septembris 1837.

JACOBUS PHILIPPUS CARD. FRANSONIUS, *Præf.*
ANGELUS MAIUS, à *Secretis.*

PETITUR DISPENSATIO SUPER JEJUNIO FERIIS QUARTIS
ET SEXTIS ADVENTUS OBTINENTE.

BEATISSIME PATER,

CUM varia sit Ecclesiarum quibus præsumus dis-
ciplina de jejunio singulis feriis quartis et sextis
Adventus servando, visum est Beatitudinem Vestram
implorare, ut Apostolicâ auctoritate consuetudinem,
quæ in pluribus diocesis obtinuit iis diebus jeju-
nandi, haud amplius obligare declaret, abstinentiæ
etiam feriis quartis obligationem solvat. Ad has
porrigendas preces, gravissimis quibus Fideles inter
Aatholicos degentes premuntur difficultatibus ad-

ducti sumus, sicut et uniformis disciplinæ studio. Precamur igitur Beatitudinem Vestram ut velit nostris annuere humillimis precibus.

Baltimori, 22 Aprilis 1837.

DECRETUM

S. CONGREGATIONIS GENERALIS DE PROPAGANDA FIDE,
DE DISPENSATIONE SUPER JEJUNIO FERIIS QUARTIS
ADVENTUS.

CUM RR. PP. DD. Archiepiscopus Baltimorensis et Episcopi diœcesum in Fœderatis Americæ Septentrionalis Provinciis existentium, in Synodo Provinciali mense Aprili anno 1837 celebratâ congregati, SSmo Dño N. GREGORIO PP. XVI, supplici libello Romam misso, retulerint magnam esse difficultatem quominus Catholici in iis regionibus morantes, feriis quartis Adventus jejunare et à carnibus abstinere possint, atque idcirco Sanctitatem Suam precati fuerint ut super eâ re dispensationem impertiri dignaretur, ratione etiam habitâ quòd non communis sit in diversis illis diœcesibus de jejunii et abstinentiæ obligatione memoratis quartis feriis observatio; S. Congregatio Generalis de Propagandâ Fide, habita die 3 Julii anno 1837, referente Esmo et Rmo D. JACOBO PHILIPPO FRANSONIO, S. Consilii Præfecto, censuit ac decrevit supplicandum SSmo Dño Nostro pro gratiâ juxta petita.

Hanc autem S. Congregationis sententiam SSmo Dño Nostro relata ab R. P. D. ANGELO MAIO, S. Consilii Secretario, in audientiâ diei 9 Julii, Sanctitas Sua benignè in omnibus probavit, et petitam dispensationem Apostolicâ autoritate concessit.

Romæ, ex Ædibus Sacræ Congregationis de Propagandâ Fide, die 2 Septembris 1837.

JACOBUS PHILIPPUS CARD. FRANSONIUS, *Præf.*
ANGELUS MAIUS, à *Secretis.*

EPISTOLA

S. CONGREG. DE PROPAGANDA FIDE AD ARCHIEPISCOPUM
BALTIMORENSEM, CIRCA PETITAM DISPENSATIONEM SUPER
JEJUNIO FERIIS SEXTIS ADVENTUS OBTINENTE.

ILLME AC RME DOMINE,

INTER ea quæ in Synodo Provinciali mense Aprili habitâ, Amplitudo tua et Episcopi diœcesum istarum, à Sede Apostolicâ petenda esse statuerunt, illud quoque, prout tibi notum est, continetur, ut videlicet dispensatio super jejunio feriis sextis Adventus servando concedatur.

S. Congregatio de eâ petitione agens, vehementer optare se professa est ut jejunii iis diebus obtinentis observatio perseveret: hoc etiam placeret in primis SSmo Dño Nostro GREGORIO PP. XVI, cui supplex libellus vester de eâ re relatus est.*

Jussit tamen Sanctitas Sua Amplitudini tuæ scribi ut, collatis cum Episcopis Collegis tuis super eo negotio consiliis, omni studio videatis jejunii memoratis diebus observationem retinere. Quòd si verò post maturam negotii considerationem, talia esse rerum adjuncta cognoscatis ut ad vitandum peccati periculum necesse esse censeatis Catholicos ab eâ

* Americæ Fœderatæ Præsules, cum nihil antiquius habeant, quàm ut suam in S. Congregationem observantiam, singulareque suum in omnibus erga S. Sedem obsequium exhibeant, jejunium in feriis sextis Adventus retinendum esse decreverunt.